



SLUŽBENI GLASNIK  
NOGOMETNOG/FUDBALSKOG SAVEZA BOSNE I HERCEGOVINE  
**»NOGOMET/FUDBAL BIH«**

**DISCIPLINSKI PRAVILNIK**  
**NOGOMETNOG/FUDBALSKOG SAVEZA**  
**BOSNE I HERCEGOVINE**

Sarajevo, juni/lipanj 2013. godine

Vanredni broj

Na osnovu člana 35. Statuta Nogometnog/Fudbalskog saveza Bosne i Hercegovine, Izvršni odbor NS/FS BiH, na sjednici održanoj 25.06.2013. godine, donosi

## **DISCIPLINSKI PRAVILNIK NOGOMETNOG/FUDBALSKOG SAVEZA BOSNE I HERCEGOVINE**

### **I OPŠTI USLOVI**

#### **Član 1.**

Disciplinski pravilnik NS/FS BiH (u daljem tekstu Pravilnik) propisuje mjere i postupke za kažnjavanje nogometni/fudbalskih/fudbalskih i stručnih organizacija, njihovih klubova i udruženja, saveza i drugih organizacija i organa, funkcionera, igrača, nogometni/fudbalskih/fudbalskih sudaca, stručnih i tehničkih rukovodilaca klubova, službenih lica (delegata, posmatrača i kontrolora) koji prekrše Pravila nogometne/fudbalske igre i sportskog ponašanja, ili povrijede Statut i pravilnike NS/FS BiH, ili na bilo koji drugi način prekrše disciplinu i štete ugledu nogometnog/fudbalskog sporta.

#### **Cilj kažnjavanja**

#### **Član 2.**

Cilj disciplinskog kažnjavanja je da pomaže pravilnom vaspitanju igrača, stručnih i sportskih radnika i da obezbijedi primjenu propisa NS/FS BiH.

#### **Prekršaj: namjerno ili propustom**

#### **Član 3.**

Ko učini prekršaj pravilnika i ostalih propisa NS/FS BiH namjerno ili propustom, biti će kažnen prema odredbama ovog Pravilnika.

#### **Nepoznavanje propisa**

#### **Član 4.**

Nepoznavanje Statuta, pravilnika i ostalih propisa NS/FS BiH nikoga ne opravdava i ne oslobađa odgovornosti.

#### **Kažnjavanje pokušaja**

#### **Član 5.**

Disciplinski prekršaj ostao je u pokušaju kada je učinilac sa umišljajem započeo ili dovršio prekršajnu radnju, ali štetna posljedica nije nastupila.

Pokušaj je kažniv samo kod onih prekršaja za koje je u Pravilniku propisano da će biti kažnen za pokušaj. Učinilac prekršaja koji je ostao u pokušaju kažnjava se kaznom propisanom za prekršaj, a može se blaže kazniti.

### **Podstrekavanje i pomaganje**

#### **Član 6.**

Ko drugoga podstrekne ili mu pomogne u izvršenju ili pokušaju izvršenja prekršaja, bit će kažnen kao da je prekršaj sam izvršio.

### **Subjekti disciplinske odgovornosti**

#### **Član 7.**

Odredbe ovog Pravilnika će se primjenjivati na:

- a) igrače;
- b) klubove, njihove timove, funkcionere i članove;
- c) stručne i tehničke rukovodioce timova – klubova;
- d) nogometna rukovodstva i njihove funkcionere;
- e) službena lica (sudije, delegati, kontrolori suđenja, komesari za bezbjednost, fizioterapeuti i doktori).

Kazne će se izreći bez obzira da li je učinilac prekršaja u vrijeme izricanja kazne još uvijek član rukovodstva, odnosno član kluba.

### **Kazne**

#### **Član 8.**

1. Za igrače:
  - a) opomena
  - b) novčana kazna;
  - c) zabrana igranja određenog broja utakmica (prvenstvenih, kup ili međunarodnih);
  - d) zabrana igranja na određeno vrijeme;
  - e) isključenje iz kluba;
  - f) isključenje iz nogometne/fudbalske organizacije.
2. Za funkcionere, stručne i tehničke rukovodioce, trenere i suce:
  - a) opomena
  - b) novčana kazna;
  - c) zabrana vršenja suđenja određenog broja utakmica;
  - d) zabrana vršenja funkcije na određeno vrijeme;
  - e) isključenje iz kluba ili rukovodstva;
  - f) isključenje iz nogometne/fudbalske organizacije.
3. Za rukovodstva nogometni/fudbalskih organizacija:
  - a) novčana kazna;
  - b) uslovna kazna;
  - c) zabrana vršenja funkcije na određeno vrijeme;

- d) smjenjivanje sa funkcije;
- e) isključenje iz nogometne/fudbalske organizacije.

#### 4. Za klubove

- a) opomena;
- b) novčana kazna;
- c) zabrana odigravanja utakmica u inostranstvu;
- d) zabrana odigravanja utakmica na određeno vrijeme na određenom stadionu ili svim stadionima određenog regiona;
- e) zabrana igranja sa gledateljima;
- f) oduzimanje bodova;
- g) negativni bodovi;
- h) vraćanje u najniži stepen takmičenja.

### **Opomena**

#### **Član 9.**

Kazna opomene izriče se za disciplinske prekršaje koji su učinjeni pod olakšavajućim okolnostima koje ih čine osobito lakšim.

### **Novčana kazna**

#### **Član 10.**

Novčane kazne se izriču u skladu sa odredbama ovog Pravilnika.

Novčana kazna za igrače, funkcionere, stručne i tehničke rukovodioce, trenere i službena lica (sudije, delegati, kontrolori suđenja, komesari za bezbjednost, fizoterapeute i doktore), osim kazni za javne opomene i isključenja, ne može biti manja od 500 KM, niti veća od 5.000 KM.

Novčana kazna za klubove ne može biti manja od 1.000 (hiljada) KM, niti veća od 30.000 (tridesethiljada) KM.

Iznos novčanih kazni, kao i iznose kazni za javne opomene i isključenja utvrđuju izvršni odbori saveza nadležnih za rukovođenje takmičenjem, u skladu sa odredbama ovog člana.

Kazne za takmičenja u omladinskog, malom i ženskom nogometu/fudbalu ne mogu biti više od polovine navadenih iznosa.

#### **Član 11.**

Rok plaćanja izrečene novčane kazne je 15 (petnaest) dana, računajući od pravosnažnosti odluke.

Ukoliko izrečena novčana kazna nije plaćena u roku iz stava 1. nastupa suspenzija.

Odluku o suspenziji donosi Disciplinska komisija NS/FS BiH na zahtjev zainteresovane strane.

Sve novčane obaveze – kazne moraju biti uplaćene u roku od 15 (petnaest) dana od dana pravomočnosti odluke, ukoliko IO NS/FS BiH ne odluči drugačije.

#### **Član 12.**

Novčane kazne i svi od kluba oduzetи protivpravno isplaćeni iznosi uplaćuju se u korist fonda za unapređenje omladinskog nogometa/fudbala odgovarajućeg saveza.

## **Zabrana igranja**

### **Član 13.**

Kazna zabrane igranja može biti vremenska ili za određeni broj utakmica.

Vremenska kazna zabrane igranja ne može biti manja od tri mjeseca i veća od 24 (dvadesetčetiri) mjeseca, a kazna zabrane igranja određenog broja utakmica ne može biti manja od jedne utakmice i veća od 12(dvanaest) prvenstvenih ili kup utakmica.

Igrač kažnjen zabranom igranja u određenom vremenskom trajanju ne može nastupiti samo u službenim utakmicama.

Igrač kažnjen zabranom igranja ne može biti u službenom zapisniku na svim utakmicama za koje je izrečena kazna zabrane igranja, niti na terenu, u sastavu vodstva kluba i na putovanju.

Pod kup utakmicama, u smislu ovog Pravilnika, podrazumijevaju se utakmice za Nogometni/fudbalski kup Bosne i Hercegovine i Omladinski kup Bosne i Hercegovine.

Način izdržavanja i računanja ove vrste kazne regulisan je članom 15. ovog Pravilnika.

Kazna zabrane igranja povlači i zabranu vršenja funkcije i obratno.

### **Član 14.**

Ukoliko je igrač, nogometni/fudbalski radnik ili klub počinio prekršaj na kup utakmici u okviru takmičenja kojim rukovodi drugi savez, u odnosu na savez koji rukovodi prvenstvenim takmičenjem u kojem učestvuje taj klub, cijelokupni predmet vezan za prekršaj ustupa se nadležnom disciplinskom organu saveza koji rukovodi prvenstvenim takmičenjem u kojem učestvuje taj klub, koji je ovlašten da provede disciplinski postupak i izrekne odgovarajuću kaznu.

Izrečena kazna se izdržava u takmičenju kojim rukovodi savez čiji je nadležni organ izrekao kaznu, kao i u tekućem ciklusu kup takmičenja kojim neposredno rukovodi drugi savez.

Ako igrač istovremeno nastupa i za tim starijeg uzrasta, kazna mu se računa prema timu u kome je nastupio kada je učinio prekršaj, s tim što sve vrijeme dok traje kazna ne može nastupati ni na utakmicama ostalih timova svoga kluba.

Ako igrač u toku izdržavanja kazne pređe u drugi klub, izdržavanje kazne nastavlja u tom klubu.

Ako do 31. jula/srpnja tekuće godine igrač mlađeg uzrasta gubi pravo nastupa za taj uzrast, a kaznu ne izdrži u cijelosti, ostatak kazne će izdržati u timu starijeg uzrasta.

Kaznu igrač nije izdržao ako nije nastupio na utakmici registrovanoj par forfe bez igre i prekinutoj od strane njegovog tima 80% prije isteka predviđenog vremena trajanja utakmice, kao i ako je utakmica poništена i određeno ponovno odigravanje.

## **Automatska kazna**

### **Član 15.**

Automatska kazna zabrane igranja jedne prvenstvene ili kup utakmice nastaje poslije svake treće javne opomene koju igrač dobije na prvenstvenim ili kup utakmicama u toku jedne takmičarske godine, ukoliko propisima NS/FS BiH ovaj vid prekršaja ne bude drugačije regulisan.

Javne opomene iz jedne ne prenose se u narednu takmičarsku godinu.

Javne opomene iz jednog stepena takmičenja ne prenose se u druge stepene takmičenja.

Automatska kazna zabrane igranja jedne utakmice dobivena na prvenstvenim utakmicama izdržava se samo na prvenstvenim utakmicama. Automatska kazna zabrane igranja jedne utakmice dobijena na kup utakmicama izdržava se na prvoj narednoj kup utakmici.

Automatsku kaznu nastalu u posljednjoj prvenstvenoj utakmici ili kup utakmici odigranoj u jednoj takmičarskoj godini igrač će izdržati na prvenstvenoj ili kup utakmici svakog kluba u narednoj takmičarskoj godini.

Automatska kazna iz velikog nogometa izdržava se u velikom nogometu, a automatska kazna iz futsal izdržava se u futsalu.

Javne opomene (žuti kartoni) zbog kojih je igrač dobio kaznu isključenja (crveni karton) ne evidentiraju se. Evidentira se samo isključenje (crveni karton).

Javne opomene i isključenja igrača na utakmicama koje su prekinute se evidentiraju.

Igrač koji istovremeno nastupa za tim starije uzrasne kategorije, automatsku kaznu zabrane igranja izdržava samo u timu u kojem je dobio tri javne opomene. Ako igrač preraste kategoriju, kaznu izdržava u timu naredne kategorije.

Automatska kazna iz stava 1. ovog člana automatski prestaje poslije prvenstvene ili kup utakmice na kojoj je igrač morao da pauzira, pa i u slučaju nastupa igrača pod automatskom kaznom na toj utakmici.

Nastup igrača pod automatskom kaznom je disciplinski prekršaj za koji se na odgovornost uzimaju igrač, odgovorni funkcijoner kluba i klub.

Ako igrač pod automatskom kaznom zabrane igranja pređe u drugi klub, istu će izdržati u tom klubu.

Klubovi su dužni da vode evidenciju opomenutih igrača.

Disciplinski organi vode evidenciju opomenutih igrača, registruju opomene u svome zapisniku, objavljaju ih putem službenog saopštenja i kontrolišu izvršenje automatske kazne.

### **Član 16.**

Automatsku kaznu zabrane igranja jedne prvenstvene ili kup utakmice igrač nije izdržao ako je njegov tim utakmicu predao bez borbe (par-forfe), kao i ako nije nastupao na utakmici koja je prekinuta prije isteka najmanje 80% vremena koje je pravilima nogometne/fudbalske igre predviđeno za tu utakmicu. Igrač tima koji je dobio utakmicu bez borbe (par-forfe) izdržao je kaznu zabrane igranja jedne prvenstvene utakmice.

### **Član 17.**

Igrač koji dobije tri javne opomene na prvenstvenim utakmicama izdržava automatsku kaznu zabrane igranja jedne utakmice samo na prvoj narednoj prvenstvenoj utakmici.

Igrač koji dobije tri javne opomene na kup utakmicama izdržava automatsku kaznu zabrane igranja jedne utakmice samo na prvoj narednoj kup utakmici.

Igrač koji dobije dvije javne opomene na prvenstvenoj utakmici i jednu javnu opomenu na kup utakmici ili obrnuto, ima pravo igranja na prvenstvenim, odnosno kup utakmicama, u smislu stava 1. i 2. ovog člana, dok ne dobije treću javnu opomenu u prvenstvu, odnosno kupu.

Ako je utakmica poništena i određeno njen ponovno odigravanje, evidentiraju se isključenja, i javne opomene i sa poništene utakmice.

Igrač koji je isključen i kažnen vremenskom kaznom nema pravo nastupa na utakmicama velikog nogometa/fudbala i futsala.

### **Zabrana vršenja funkcije**

#### **Član 18.**

Kazna zabrane vršenja funkcije ne može biti manja od 3 (tri) mjeseca ni duža od dvije godine, a izriče se na pune mjesecce i godine.

Lice kažnjeno ovom vrstom kazne ne može obavljati nikakvu funkciju u bilo kojem organu kluba, udruženja i saveza na utakmici i dr. niti zastupati klub ili organizaciju u bilo kojoj funkciji, za sve vrijeme trajanja kazne.

Nogometni/fudbalski trener, stručni i tehnički rukovodilac, direktor kluba i sl. koji obavljaju tu funkciju, izdržava ovu kaznu prema odredbama stava 2. ovog člana.

Kazna zabrane vršenja funkcije obuhvata kaznu zabrane igranja.

### **Zabrana odigravanja utakmica u inostranstvu**

#### **Član 19.**

Kazna zabrane odigravanja utakmica u inostranstvu ne može biti kraća od jedne godine ni duža od pet godina.

Za vrijeme trajanja kazne iz prethodnog stava igrači i funkcioneri tog kluba ne mogu gostovati u inostranstvu u bilo kojoj funkciji u vezi sa nogometnim/fudbalskim sportom.

Igrači kažnjene klube isključivo mogu nastupiti kao članovi reprezentacije Bosne i Hercegovine.

### **Zabrana odigravanja utakmica na određenom stadionu**

#### **Član 20.**

Kazna zabrane odigravanja utakmica na određenom stadionu ili stadionima određenog regiona ne može biti manja od tri mjeseca, ni veća od dvije godine, odnosno najmanje jednu, a najviše 12 prvenstvenih ili kup utakmica, s tim što se uz ovu kaznu obavezno izriče i novčana kazna od 1.000 KM do 5.000 KM.

Disciplinski organ svojom odlukom određuje region na koji se primjenjuje zabrana, stadion na kojem se dogodio incident, ili stadion udaljen od mjesta prekršaja 50 (pedeset) kilometara.

## **Oduzimanje bodova i negativni bodovi**

### **Član 21.**

Kazna oduzimanja bodova ne može biti manja od dva boda, ni veća od 24 boda.

Klub kažnjen ovom kaznom gubi određeni broj bodova od onih koje je osvojio do izricanja kazne. Ukoliko klub do izricanja ove kazne nije osvojio dovoljan broj bodova da bi se kazna mogla primijeniti, ovi bodovi će se oduzeti od onih koje klub osvoji do kraja takmičarske godine.

Ako ni do tada ne osvoji dovoljan broj bodova, tada će ostatak kazne prenijeti u narednu takmičarsku godinu.

## **Kažnjavanje kluba i njegovih timova**

### **Član 22.**

Kazna za klub može se odnositi na cijel klub, zajedno sa svim timovima, ili na određeni tim – seniorski, omladinski, kadetski, pionirski – koji je učinio prekršaj, što disciplinski organ utvrđuje odlukom o kazni.

## **Vraćanje u najniži stepen takmičenja**

### **Član 23.**

U slučaju odustajanja kluba od takmičenja, klub se kažnjava oduzimanjem 6 (šest) bodova za narednu takmičarsku godinu i vraćanjem u najniži stepen takmičenja.

Klub se vraća u najniži stepen takmičenja za prekršaj iz člana 62. ovog Pravilnika.

## **Smjenjivanje rukovodstva**

### **Član 24.**

Kazna smjenjivanja rukovodstva predstavlja uklanjanje sa položaja svih lica koja prema statutu kluba ili druge nogometne/fudbalske organizacije rukovode u tom klubu, odnosno nogometnoj/fudbalskoj organizaciji.

## **Isključenje iz nogometne/fudbalske organizacije**

### **Član 25.**

Kazna isključenja iz nogometne/fudbalske organizacije izriče se za teže disciplinske prekršaje predviđene ovim Pravilnikom.

Lice kažnjeno ovom vrstom kazne briše se iz članstva nogometne/fudbalske organizacije i ne može obavljati bilo koju funkciju u nogometnom/fudbalskom sportu.

## **Odmjeravanje kazne**

### **Član 26.**

Prilikom odmjeravanja kazne počiniocu disciplinskog prekršaja uzimaju se u obzir sve olakšavajuće i otežavajuće okolnosti koje postoje u konkretnom slučaju.

## **Sticaj više disciplinskih prekršaja**

### **Član 27.**

Ako je izvršeno više prekršaja u sticaju, prethodno će biti utvrđena visina kazne za svaki prekršaj i izreći jedinstvena kazna, koja ne može preći dvostruku visinu najteže utvrđene kazne.

U slučaju jednog ili sticaja više disciplinskih prekršaja, učinilac prekršaja može se, osim kazne zabrane odigravanja utakmica ili zabrane obavljanja funkcije, kazniti i novčanom kaznom.

### **Član 28.**

Ako se protiv učinioca prekršaja vodi postupak pred više disciplinskih organa, provešće ga onaj disciplinski organ pred kojim je taj postupak započeo.

## **Teži prekršaj**

### **Član 29.**

Kao teži disciplinski prekršaj, za koji disciplinski organi počiniocu mogu izreći najstrožiju kaznu, u okviru propisane kazne za taj prekršaj, smatra se prekršaj pri kojem je učinilac postupio sa naročitom drskošću, upornošću ili bezobzirnošću, ili je prekršaj proizveo naročito teške posljedice, ili je učinjen pod naročito otežavajućim okolnostima.

## **Zastarjelost**

### **Član 30.**

Disciplinski postupak ne može biti pokrenut, niti se može voditi ukoliko je od dana učinjenog prekršaja proteklo više od 12 mjeseci.

Zastarjelost se prekida svakom radnjom ovlaštenog organa, poduzetom protiv učinitelja prekršaja, ali bez obzira na prekide, zastarjelost u svakom slučaju nastupa kada proteknu dvije godine od učinjenog prekršaja.

## **Kažnjavanje bez saslušanja**

### **Član 31.**

Niko ne može biti kažnjen po prijavi prije nego što bude saslušan. Smatra se da je neko saslušan ako na poziv nadležnog organa dostavi izjavu.

Ako učinilac prekršaja odbije da pristupi saslušanju iako je uredno pozvan, ili blagovremeno ne dostavi pismenu izjavu na zahtjev nadležnog organa, postupak će biti završen i bez njegovog saslušanja.

## **Evidencija o kazni**

### **Član 32.**

Pravosnažne odluke o kazni upisuju se u registar kazni.

Registar kazni vodi disciplinski organ, odnosno nadležno lice u nogometnom/fudbalskom savezu.

Pravosnažne odluke o kazni brišu se iz registra kazni protokom godinu dana nakon izdržane kazne.

### **Član 33.**

Pravosnažne odluke o kaznama isključenja iz nogometne/fudbalske organizacije, a za funkcionere i odluke o vremenskoj kazni preko šest mjeseci dostavljaju se nadležnom organu NS/FS BiH.

### **Dejstvo disciplinskih odluka**

### **Član 34.**

Odluke svih nadležnih organa nogometne/fudbalske organizacije djeluju unutar cijele nogometne/fudbalske organizacije, a odluke disciplinskih organa klubova i stručnih organizacija (sudije, treneri, nogometni/fudbalski funkcionići i ostali), ukoliko nisu potvrđene prema odredbama ovog Pravilnika od strane nadležnog disciplinskog organa nogometne/fudbalske organizacije, djeluju samo u okviru kluba, odnosno stručne organizacije.

### **Potvrđivanje klupske kazne i kazne stručne organizacije**

### **Član 35.**

Odluka o kazni koju izrekne klub djeluje samo unutar kluba.

Odluka o kazni koju je izrekla stručna organizacija (treneri i sudije) djeluje samo unutar organizacije.

Da bi odluka o kazni koju izrekne klub i stručna organizacija djelovala u okviru cijele nogometne/fudbalske organizacije, klub i stručna organizacija dužni su da u roku od osam dana od pravosnažnosti odluke o kazni disciplinskom organu nadležnog nogometnog/fudbalskog saveza dostave svoj prijedlog i kompletan spis predmeta radi potvrđivanja izrečene kazne.

Potvrđivanje klupske kazne odnosi se isključivo na kaznu-zabrana igranja.

Ako disciplinski organ nadležnog nogometnog/fudbalskog rukovodstva potvrdi izrečenu kaznu, onda ona djeluje kao svaka druga kazna izrečena od nadležnog disciplinskog organa NS/FS BiH.

Nadležni disciplinski organ ne može potvrditi kaznu koju je izrekao klub po završetku posljednje prvenstvene utakmice odgovarajuće takmičarske godine.

### **Nadležnost organa velikog nogometa/fudbala i futsala**

### **Član 36.**

Kazne zabrane igranja određenog broja utakmica koje je izrekao disciplinski organ velikog nogometa/fudbala izdržavaju se na prvenstvenim i kup utakmicama velikog nogometa/fudbala.

Kazne zabrane igranja određenog broja utakmica koje je izrekao disciplinski organ malog nogometa/fudbala izdržavaju se na prvenstvenim i kup utakmicama futsala .

Vremenske kazne zabrane igranja koje je izrekao disciplinski organ velikog nogometa/fudbala odnose se na zabranu igranja u velikom i malom nogometu/fudbalu.

Vremenske kazne zabrane igranja koje je izrekao disciplinski organ malog nogometa/fudbala odnose se na zabranu igranja u malom i velikom nogometu/fudbalu.

## **Prekršaj na međunarodnim utakmicama**

### **Član 37.**

Igrač isključen na utakmici koja se igra u okviru međunarodnih takmičenja odgovara prema propisima međunarodne organizacije koja provodi to takmičenje.

Igrač iz prethodnog stava, ukoliko nije suspendovan ili kažnen posebnom odlukom disciplinskog organa NS/FS BiH, ima pravo nastupa na prijateljskim, kup i prvenstvenim utakmicama u BiH.

Za prekršaj koje igrač, funkcijonjer, stručni i tehnički rukovodilac, klub i stručni radnik (trener i sudac) učine na prijateljskoj međunarodnoj utakmici u zemlji ili inostranstvu, disciplinske mjere preduzimaju disciplinski organi saveza koji je u skladu sa odredbama Pravilnika o nogometnim/fudbalskim takmičenjima nadležan za odobravanje odnosne utakmice.

## **Odgovornost klubova za rad funkcijonera**

### **Član 38.**

Za sve prekršaje koje izvrše članovi organa upravljanja kluba i drugi funkcijoneri kluba, kao predstavnici svojih klubova, odgovornost mogu snositi i sami klubovi.

## **Prekršaj prema asistentu sudije i četvrtom sucu**

### **Član 39.**

Prekršaj izvršen prema asistentu sucu i četvrtom sucu smatra se kao prekršaj izvršen prema sucu.

## **Korištenje nedozvoljenih stimulativnih sredstava**

### **Član 40.**

U slučaju da se u predviđenom postupku utvrdi da je igrač koristio nedozvoljena stimulativna sredstva, izriče se kazna igraču i odgovornoj osobi u klubu.

Kao nedozvoljena stimulativna sredstva smatraju se medikamenti koji se nalaze na listi zabranjenih stimulativnih sredstava, utvrđenoj od strane Međunarodnog olimpijskog komiteta.

## **Povrede propisa i društveno sportskog vladanja**

### **Član 41.**

Učinilac prekršaja koji izričito nije predviđen ovim Pravilnikom, a predstavlja povredu Statuta, pravilnika i drugih propisa NS/FS BiH i prelazi uobičajene okvire dopuštene sportske i društvene djelatnosti, te u svojim obilježjima ima sličnosti sa jednim od prekršaja sadržanih u ovom Pravilniku, će biti kažnen odgovarajućom vrstom kazne za sličan slučaj.

## **II POSEBNI DIO**

### **Prekršaji**

#### **Član 42.**

Igrač koji na prvenstvenim i kup utakmicama u toku jedne takmičarske godine dobije tri javne opomene automatski je kažnjen i nema pravo nastupa na prvenstvenim, odnosno kup utakmicama, u skladu sa članovima 15, 16. i 17. ovog Pravilnika.

Pod javnom opomenom u smislu ovog Pravilnika smatraju se sve javne opomene koje sudija, primjenjujući Pravila nogometne/fudbalske igre, izrekne igračima koji nastupaju, a upisanim u zapisnik utakmice od prvog do posljednjeg minuta utakmice odigrane u punom trajanju (uključujući i produžetak i izvođenje kaznenih udaraca) ili prekinute prije isteka vremena predviđenog Pravilima nogometne/fudbalske igre.

Sudija je dužan da delegatu utakmice prijavi svaku javnu opomenu koju je izrekao na utakmici i da ih upiše u zapisnik sa utakmice.

#### **Član 43.**

Ko se nesportski ponaša prema saigraču ili igraču protivničkog tima, sudiji, funkcioneru, rukovodstvima nogometne/fudbalske organizacije i gledaocima, za vrijeme igre, poslije igre na terenu ili van njega, a u vezi sa nogometnim/fudbalskim sportom, će biti kažnjen:

- opomenom ili
- novčanom kaznom ili
- zabranom igranja od jedne do četiri prvenstvene ili kup utakmice ili
- zabranom vršenja funkcije od tri mjeseca do šest mjeseci a u težem ili ponovljenom slučaju:
- zabranom igranja od tri do devet prvenstvenih ili kup utakmica ili
- zabranom igranja od tri do devet mjeseci ili
- zabranom vršenja funkcije od šest mjeseca do dvije godine

Kaznom iz stava jedan kažnjavat će se i na osnovu TV snimka (snimak utakmice).

Pod nesportskim ponašanjem podrazumijeva se: psovanje, pljuvanje, nepristojni gestovi, prigovaranje i prkošenje odlukama suca i rukovodstva nogometne/fudbalske organizacije i funkcionera koji vrše određenu dužnost, kao i izazivanje igrača svoga i protivničkog tima, funkcionera i gledalaca riječima, pokretima i gestovima, podizanje i skidanje dresa u cilju pokazivanja poruka kao i sve radnje koje mogu štetiti ugledu nogometnog/fudbalskog sporta.

### **Gruba igra**

#### **Član 44.**

Igrač koji igra grubo će biti kažnjen:

- zabranom igranja od jedne do pet prvenstvenih ili kup utakmica.

Pod grubom igrom podrazumijeva se dolaženje u dodir sa protivničkim igračem na nedozvoljen način ili način protivan Pravilima nogometne/fudbalske igre, sa upotrebom prekomjerne snage kao i startovanje sa obje noge, podmetanje džona, saplitanje protivnika, neizbjegavanje povrede protivnika, odnosno prekoračenje samozaštite i sl.

## **Pogibeljna igra**

### **Član 45.**

Igrač koji igra pogibeljno, a ne nanese povredu protivničkom igraču, će biti kažnjen:

- zabranom igranja od tri do osam prvenstvenih ili kup utakmica.

Igrač koji igra pogibeljno, pa povrijedi protivničkog igrača, će biti kažnjen:

- zabranom igranja od šest do 12 utakmica a u težem ili ponovljenom slučaju:
- zabranom igranja od tri mjeseca do godinu dana.

Pod pogibeljnom igrom podrazumijeva se takva igra kod koje kao posljedica nastupa, ili bi moglo nastupiti onesposobljavanje protivničkog igrača trajno ili za duže vrijeme.

## **Fizički napad**

### **Član 46.**

Igrač koji udari saigrača ili protivničkog igrača u trenutku kada ovaj nije u posjedu lopte, će biti kažnjen:

- zabranom igranja od tri do 12 prvenstvenih ili kup utakmica.  
a u težem ili ponovljenom slučaju:
- zabranom igranja u trajanju od tri mjeseca do godinu dana.

Pod fizičkim napadom se podrazumijeva udarac određenim dijelom tijela ili nekim predmetom, ali ne guranje ili odgurivanje, osim u slučaju kada je sudija uslijed guranja ili odgurivanja oboren na tlo. Ova odredba se odnosi na prekršaje navedene u članovima 47, 48, 49, 50 i 51. ovog Pravilnika.

### **Član 47.**

Igrač koji fizički napadne saigrača ili protivničkog igrača za vrijeme utakmice na terenu ili van njega, a u vezi sa nogometnim/fudbalskim sportom, će biti kažnjen:

- zabranom igranja u trajanju od tri mjeseca do godinu dana  
a u težim slučajevima, kada se utvrdi da je igrač nanio ili imao namjeru da nanese težu povredu, će biti kažnjen:
- zabranom igranja u trajanju od godinu dana do dvije godine

### **Član 48.**

Igrač koji fizički napadne suca, delegata ili drugo službeno lice na stadionu i izvan njega u vezi sa nogometnim/fudbalskim sportom, će biti kažnjen:

- zabranom igranja od šest mjeseci do godinu dana  
a u ponovljenom ili težem slučaju, kada se utvrdi da je igrač nanio ili imao namjeru da nanese težu povredu, će biti kažnjen:
- zabranom igranja u trajanju od godinu dana do dvije godine.

### **Član 49.**

Igrač koji napadne člana nogometnog/fudbalskog rukovodstva ili njegovog predstavnika za vrijeme vršenja funkcije, će biti kažnjen prema odredbama člana 46. ovog Pravilnika.

### **Član 50.**

Igrač koji fizički napadne gledaoca za vrijeme igre ili poslije završetka utakmice, će biti kažnjen:

- zabranom igranja od tri do dvanaest prvenstvenih ili kup utakmica  
a u težem ili ponovljenom slučaju:
- zabranom igranja od tri mjeseca do godinu dana

### **Član 51.**

Nogometni/fudbalski radnik službena lica koji fizički napadne igrača službena lica, funkcionera protivničkog kluba ili gledaoca, će biti kažnjen:

- zabranom vršenja funkcije od šest mjeseci do godinu dana  
a ukoliko fizički napadne funkcionera nogometne/fudbalske organizacije i rukovodstva, delegata ili sudiju, će biti kažnjen:
- zabranom vršenja funkcije od godinu dana do dvije godine  
a u težem ili ponovljenom slučaju
- isključenjem iz nogometne/fudbalske organizacije

Za ovaj prekršaj, pored naprijed navedenih kazni, obavezno se izriče i novčana kazna od 500 KM do 2.000 KM, a u težem ili ponovljenom slučaju od 2.000 KM do 5.000 KM.

### **Slaba organizacija utakmice i neredi na stadionu**

#### **Član 52.**

Klub koji ne organizuje utakmicu u skladu sa propisima nadležnog nogometnog/fudbalskog rukovodstva, ne odredi redare ili ih odredi u nedovoljnom broju, će biti kažnjen:

- novčanom kaznom od 1.000 do 2.000 KM

Zabranjuje se svaka upotreba pirotehničkih sredstava na tribinama i ograđenom dijelu terena, te ukoliko klub organizator ne sprječi unošenje istih će biti kažnjen:

- novčanom kaznom od 1.000 do 8.000 KM

#### **Član 53.**

Klub organizator utakmice na čijem se stadionu, bilo da je vlasnik ili korisnik stadiona, u vezi sa utakmicom, prije ili poslije utakmice, dogode neredi, a utvrdi se da nije preuzeo mjere da ih sprječi, ili da ih nije preuzeo u dovoljno mjeri, će biti kažnjen:

- u lakšem slučaju novčanom kaznom od 2.000 KM do 5.000 KM  
a u težem ili ponovljenom slučaju:
- novčanom kaznom od 5.000 KM do 15.000 KM, s tim što sed može izreći i kazna odigravanja bez gledalaca ili zabrana odigravanja na svom stadionu ili na svim stadionima određenog regiona, od dvije do šest utakmica.

Organ koji rukovodi takmičenjem može da suspenduje teren za odigravanje utakmica kluba iz stava 1. ovog člana za vrijeme vođenja postupka, do donošenja konačne odluke, vodeći računa da taj postupak mora biti hitan.

Fizički napad posmatrača na učesnika igre - igrača, zamjenika, stručna, tehnička i službena lica - sudije i delegata i druga službena lica, smatra se težim prekršajem u smislu stava 1. ovog člana.

Ukoliko se utvrdi da su za nerede krivi gostujući klub ili njegovi navijači, primjenjuju se odredbe iz stava 1. tačka 1. i 2. ovog člana.

## **Prekid igre, napuštanje terena, neodigravanje utakmice**

### **Član 54.**

Fudbalski/nogometni radnik, trener, Igrač ili bilo koja druga osoba čijom je krivicom igra prekinuta, pa ne bude nastavljena, će biti kažnjen:

- zabranom igranja od tri do 12 utakmica i novčanom kaznom od 500 do 2.000 KM  
a u težem ili ponovljenom slučaju
- zabranom igranja od šest mjeseci do godinu dana

### **Član 55.**

Ako je tim za vrijeme utakmice prouzrokovao nerede uslijed kojih je utakmica morala prekinuti, će biti kažnjen:

- oduzimanjem od tri do šest bodova i novčanom kaznom, od 1.000 do 5.000 KM.  
a u težim slučajevima:
- oduzimanjem od šest do 12 bodova i novčanom kaznom od 5.000 do 15.000 KM.

### **Član 56.**

Igrač ili nogometni/fudbalski radnik koji nagovara tim da iz bilo kojih razloga napusti teren, ili ne započne određenu igru, će biti kažnjen:

- zabranom igranja u trajanju od šest mjeseci do godinu dana i novčanom kaznom od 500 do 2.000 KM
- zabranom vršenja funkcije u trajanju od šest mjeseci do godinu dana i novčanom kaznom od 500 do 2.000 KM  
a u težem ili ponovljenom slučaju:
- zabranom igranja ili vršenja funkcije od jedne do dvije godine i novčanom kaznom od 2.000 do 5.000 KM

Ako se prihvati nagovaranje i teren napuste do tri igrača, a ostali nastave igru, igrači koji su napustili teren će biti kažnjen:

- zabranom igranja od šest mjeseca do godinu dana.

Ako teren napuste najmanje četiri igrača, ili tim ne otpočne igru, će biti kažnjen:

- igrači - zabranom igranja od šest mjeseci do godinu dana.
- tim - oduzimanjem od tri do 12 bodova, odnosno od tri do 12 negativnih bodova.

### **Član 57.**

Tim koji neopravdano ne nastupi na utakmici stalnog takmičenja, odnosno neopravdano ne dođe na odigravanje ugovorene utakmice, će biti kažnjen:

- oduzimanjem od tri do 12 boda, odnosno od tri do 12 negativnih bodova
- a klub izmirenjem troškova nastalih neodigravanje utakmice, čiju visinu, uz obrazložen zahtjev oštećene strane, utvrđuje disciplinski organ.

## **Odustajanje od takmičenja**

### **Član 58.**

Klub koji neopravdano odustane od takmičenja će biti kažnjen:

- vraćanjem u najniži stepen takmičenja i oduzimanjem od 6 (šest) do 12 (dvanaest) negativnih bodova za narednu takmičarsku godinu.

## **Nepравилно nastupanje**

### **Član 59.**

Igrač koji nastupi na javnoj utakmici:

- za klub koji nije registrovan;
- za svoj klub, prije nego što je stekao pravo nastupanja;
- u timu drugog kluba na prijateljskoj utakmici koja se igra u dobrovorne svrhe, a bez odobrenja nadležnog organa;
- za bilo koju selekciju svog kluba ako prema odredbama Pravilnika o nogometnim/fudbalskim takmičenjima nije imao pravo nastupa;
- na utakmicama nogometnog/fudbalskog kupa u timu u kojem, prema propozicijama, nije imao pravo nastupa;
- bez važećeg ljekarskog pregleda, u smislu odredbi Pravilnika o nogometnim/fudbalskim takmičenjima ili kojem je od strane ljekara i delegata zabranjen nastup;
- koji je u toku dana već nastupio na jednoj utakmici;
- koji se nalazi pod suspenzijom ili kaznom će biti kažnjen;
- novčanom kaznom i kaznom zabrane igranja od šest do 12 utakmica.

a klub koji je takvog igrača uvrstio u tim:

- oduzimanjem od tri do devet bodova ili
- kaznom od tri do devet negativnih bodova

Pod izrazom nastupio, u smislu ovog člana, ne podrazumijevaju se zamjenski igrači upisani u zapisnik sa utakmice, koji nisu učestovali u igri, što se ne odnosi na igrače iz zapisnika sa utakmice futsala.

### **Član 60.**

Ako klub-tim koji se nalazi pod suspenzijom ili kaznom, nastupi na javnoj utakmici, će biti kažnjen:

- oduzimanjem od tri do šest bodova ili kaznom od tri do šest negativnih bodova a u težem ili ponovljenom slučaju:
- oduzimanjem od šest do 12 bodova ili kaznom od šest do 12 negativnih bodova

Ista kazna će se primijeniti i na klub koji nastupi protiv suspendovanog ili kažnenog kluba, ukoliko je blagovremeno - najkasnije 48 sati prije odigravanja utakmice - pismeno obaviješten o suspenziji ili kazni kluba.

## **Nedolazak na reprezentativne utakmice, trening i pripreme**

### **Član 61.**

Igrač koji neopravданo ne dođe na pripreme, trening ili utakmicu bilo koje reprezentativne selekcije BiH ili ih neopravданo napusti, će biti kažnjen:

- zabranom igranja od dvije do šest prvenstvenih ili kup utakmica i novčanom kaznom od 1.000 KM do 2.000 KM

Igrač ili nogometni/fudbalski radnik koji nagovori igrača da se ne odaziva pozivu za nastup na reprezentativnoj utakmici ili za odlazak na trening i pripreme, odnosno da napusti trening ili pripreme, će biti kažnjen:

- zabranom igranja, odnosno vršenja funkcije od tri mjeseca do godinu dana a ako je to ometanje vršio klub preko svojih funkcionera ili na drugi način, će biti kažnjen:  
novčanom kaznom od 5.000 KM do 20.000 KM

## **Učešće u neregularnosti**

### **Član 62.**

Igrač, stručni radnik, nogometni/fudbalski radnik ili klub koji, u svoje, ili u ime treće strane:

- nagovara igrače u direktnom kontaktu ili preko drugog lica da ne igra prema svom najboljem znanju i da se ne zalaže za svoj tim.

- obećava ili pruža poklone, ili drugu materijalnu prednost igraču u direktnom kontaktu, ili preko drugog lica, da jednu ili više utakmica lažira, igra tako da posluži njemu ili drugom klubu.

- nagovara, dogovara, obećava ili pruža poklone i drugu materijalnu pogodnost igraču, funkcioneru kluba, sudiji ili članu nogometnog/fudbalskog rukovodstva da lažira utakmicu, odnosno da učine nešto što je protivno postojećim propisima, odnosno ne učine ono što su dužni da izvrše prema propisima nogometne/fudbalske organizacije

- prihvati ponudu od strane igrača, kluba, sudije, trenera i funkcionera za bilo koji od naprijed navedenih primjera.

- i na drugi način učestvuje u neregularnosti će biti kažnjen:
- igrač - zabranom igranja od šest mjeseci do dvije godine
- funkcioner kluba, sudac, stručni radnik i član nogometnog/fudbalskog rukovodstva - zabranom vršenja funkcije od jedne do dvije godine
- klub – vraćanjem u niži stepen takmičenja i oduzimanjem od 6 (šest) do 18 (osamnaest) bodova ili kaznom od 6 (šest) do 18 negativnih bodova

U ponovljenom ili težem slučaju, će biti kažnjen:

- igrač - isključenjem iz nogometne/fudbalske organizacije.
- funkcioner kluba, sudac, stručni radnik i član nogometnog/fudbalskog rukovodstva - isključenjem iz nogometne/fudbalske organizacije.
- klub - vraćanjem u najniži stepen takmičenja i kaznom od 6 (šest) do 18 (osamnaest) negativnih bodova.

Za pokušaj će biti kažnjen.

## **Propusti u snimanju utakmica i dostavljanju video-materijala i korištenju oficijalnog razгласa**

### **Član 63.**

Klub koji je prema propisima obavezan, a ne snimi utakmicu, ili koji ne dozvoli gotujućem klubu snimanje utakmice, klub koji u propisanom roku nadležnom organu ne dostavi video-materijal sa utakmice, ili ga dostavi u neispravnom ili neupotrebljivom stanju, će biti kažnjen:

- novčanom kaznom od 2.000 KM do 5.000 KM a u težem ili ponovljenom slučaju;
- novčanom kaznom od 5.000 KM do 10.000 KM.

Kaznom iz stava 1 kaznit će se klubovi ako su odgovorni za snimanje utakmice.

Klub koji koristi alternativni razglas kazni će se:

- novčanom kaznom od 5.000 KM do 10.000 KM.

Klub koji koristi oficijelni razglas na način da pospješuje i podstrekava navijače na nedolično, nekulturno ponašanje, kao i vrijedanje protivničkih igrača na nacionalnoj, vjerskoj ili rasnoj osnovi će biti kažnjen:

- novčanom kaznom od 5.000 KM do 10.000 KM;  
a u ponovljenom slučaju :
- zabranom odigravanju utakmice na svom stadionu.

## **Vrijedanje i klevetanje**

### **Član 64.**

Klub, igrač ili nogometni/fudbalski radnik koji:

- vrijeda, ponižava, omalovažava, kleveta ili širi neistine o klubovima, pojedincima ili nogometnom/fudbalskom rukovodstvu;
- diskriminiše klubove, pojedince ili nogometna/fudbalska rukovodstva, a posebno po osnovu religijskog, nacionalnog (etničkog), ili rasnog porijekla;
- vrijeda ili omalovažavadržavne simbole (grb, himna, zastava)
- neovlašteno daje izjave za medije a davalac izjave nije demantovao svoju izjavu u javnim medijima u roku od 72 sata

će biti kažnjen:

- igrač i nogometni/fudbalski radnik - novčanom kaznom od 1000 do 3.000 KM
- klub - novčanom kaznom od 3.000 do 5.000 KM;  
a u ponovljenom, ili težem slučaju, će biti kažnjen:
- igrač - zabranom igranja od tri mjeseca do jedne godine;
- nogometni/fudbalski radnik -zabranom vršenja funkcije od tri mjeseca do dvije godine;
- klub - oduzimanje od tri do 12 bodova, ili kaznom od tri do 12 negativnih bodova.

## **Prekršaj u vezi sa registracijom igrača**

### **Član 65.**

Igrač, nogometni/fudbalski radnik ili klub koji u vezi sa registracijom:

- pruži lažne, netačne, ili nepotpune podatke od značaja za pravilno sprovođenje

registracije;

- prepravlja ili unosi određene podatke u dokumenta za registraciju: nogometnu/fudbalsku legitimaciju, ispisnicu, potvrdu o brisanju, ugovore ako je riječ o profesionalnim ili vrhunskim sportistima;
- istovremeno se registruje za dva ili više nogometnih/fudbalskih klubova;
- na bilo koji drugi način obmane svoj ili protivnički klub i nogometno/fudbalsko rukovodstvo u vezi sa registracijom od značaja za pravilno provođenje registracije za pravilan nastup će biti kažnjen:

- igrač - zabranom igranja od tri mjeseca do godinu dana;
- nogometni/fudbalski radnik-zabranom vršenja funkcije od tri mjeseca do godinu dana;
- klub sa čijim je znanjem izvršena nepravilna registracija - oduzimanjem od tri do devet bodova, odnosno kaznom od tri do devet negativnih bodova.

Član komisije za registraciju igrača sa čijim je znanjem izvršena nepravilna registracija, će biti kažnjen:

- zabranom vršenja funkcije u trajanju od jedne do dvije godine.

Za pokušaj će biti kažnjen.

### **Obmanjivanje i dovođenje u zabludu**

#### **Član 66.**

Igrač, nogometni/fudbalski radnik ili klub koji:

- pruža lažne, netačne i nepotpune podatke ili neovlašćeno prepravlja određene podatke od značaja za pravilan nastup i pravilnu registraciju u zapisniku sa utakmice, nogometnoj/fudbalskoj legitimaciji, ispisnici, potvrdi o brisanju i drugim dokumentima za registraciju igrača;

- pruža lažne, netačne i nepotpune podatke o zapisniku sa utakmica, svom izvještaju kao delegat rukovodstva takmičenja i tako obmane nogometni/fudbalski organ u utvrđivanju činjeničnog stanja i preduzimanja odgovarajućih mjera;

- pruži lažne, netačne, nepotpune podatke u vezi sa normativima stručno-pedagoškog rada, koji su od značaja za takmičenje kluba u odgovarajućem stepenu takmičenja;

- zloupotrijebi svoju počasnu-službenu propusnicu/ulaznicu za besplatno praćenje utakmice;

- lažno se predstavi da je funkcioner kluba, udruženja ili saveza na određenoj utakmici;

- obmane i dovede u zabludu nogometno/fudbalsko rukovodstvo ili klub u bilo kojem obliku će biti kažnjen:

- igrač i nogometni/fudbalski radnik - novčanom kaznom od 500 do 2.000 KM;
- klub - novčanom kaznom od 2.000 do 5.000 KM.  
a u težem ili ponovljenom slučaju:
- igrač - zabranom igranja od tri mjeseca do godinu dana;
- nogometni/fudbalski radnik - zabranom vršenja funkcije od jedne do dvije godine;
- klub - oduzimanjem od tri do devet bodova, odnosno kaznom od tri do devet negativnih bodova.

Za pokušaj će biti kažnjen.

## **Zanemarivanje obaveza**

### **Član 67.**

Ko prema nogometnom/fudbalskom rukovodstvu zanemaruje svoje obaveze:

- nedostavljanjem ispisnice i legitimacije kada je prema nogometnim/fudbalskim propisima na to obavezan;
- neisplaćivanjem ili kašnjenjem u isplati troškova sudaca i delegata i drugih obaveza iz sportskih odnosa;
- neplaćanjem članarina za klub i igrače;
- nepodnošenjem delegatu utakmice nogometnih/fudbalskih legitimacija, zapisnika i drugih dokumenata predviđenih propozicijama takmičenja;
- neprijavljinjanjem ili neblagovremenim prijavljivanjem javnih utakmica i turnira;
- otežavanjem rada nogometnih/fudbalskih organa nedostavljanjem ili kašnjenjem odgovora ili izvještaja;
- neizvršavanjem drugih dužnosti i obaveza koje proističu iz pravilnika i drugih propisa nogometne/fudbalske organizacije

će biti kažnjen:

- igrač - zabranom igranja od dvije do šest utakmica;
- nogometni/fudbalski radnik - zabranom vršenja funkcije od tri do 12 mjeseci;
- klub - novčanom kaznom od 2.000 KM do 5.000 KM.

## **Otežavanje istrage**

### **Član 68.**

Ko nogometnim/fudbalskim rukovodstvima i njihovim organima otežava istragu davanjem netačnih podataka će biti kažnjen:

- igrač i nogometni/fudbalski radnik - novčanom kaznom od 500 do 2.000 KM;
- klub - novčanom kaznom od 2.000 do 5.000 KM.

Zbog neodazivanja na prvi poziv, ako je saslušanje neophodno radi utvrđivanja činjeničnog stanja, disciplinski organ može izreći suspenziju koja traje prema odredbama ovog Pravilnika.

## **Neprovođenje odluka nadležnih organa**

### **Član 69.**

Ko ne izvršava odredbe propisa, kao i odluka nadležnog organa nogometnog/fudbalskog rukovodstva će biti kažnjen:

- klub - novčanom kaznom od 1.000 KM do 5.000 KM;
- nogometni/fudbalski radnik - zabranom vršenja funkcije od tri mjeseca do godinu dana;  
a u ponovljenom ili težem slučaju:
- klub - oduzimanjem od dva do šest bodova ili kaznom od dva do šest negativnih bodova;
- nogometni/fudbalski radnik - zabranom vršenja funkcije od šest mjeseci do godinu dana.

## **Kazne za korištenje nedozvoljenih stimulativnih sredstava**

### **Član 70.**

Ukoliko se u odgovarajućem postupku utvrdi da je igrač koristio doping ili druga nedozvoljena stimulativna sredstva, kazniće se:

- igrač - zabranom igranja prvenstvenih i kup utakmica u trajanju od šest mjeseci do jedne godine, a u ponovljenom slučaju od jedne do dvije godine;
- odgovorno lice u klubu - zabranom vršenja funkcije u trajanju od šest mjeseci do jedne godine, a u ponovljenom slučaju od jedne do dvije godine;
- klub - oduzimanjem od tri do devet bodova, ili od tri do devet negativnih bodova, a u ponovljenom slučaju od šest do 12 bodova, ili šest do 12 negativnih bodova.

## **Neizvršavanje obaveza u postupku licenciranja klubova**

### **Član 71.**

Ukoliko Aplikant za licencu ili odgovorno lice u postupku licenciranja kluba ne poštjuju rokove, falsificuje dokumente, prezentiraje netačne podatke ili na drugi način dovedu u zabludu Davaoca licence, prekrše princip povjerljivosti, kao i postupaju protivno odredbama Pravilnika o licenciranju klubova, će biti kažnjeni: Odgovorna lica u fudbalskim/nogometnim klubovima:

- opomena;
- novčana kazna od 500 KM do 2.000 KM;
- zabrana vršenja funkcije,  
a u težem ili ponovljenom slučaju aplikant ili odgovorno lice će biti kažnjen od 3 mjeseca do 1 godine.

klubovi:

- opomena;
- novčana kazna od 1.000 KM do 5.000 KM,  
a u težem ili ponovljenom slučaju od 5.000 KM do 20.000 KM

zabrana igranja utakmica ukoliko se prekršaj odnosi na isprave koje na određenom stadionu dokazuju ispravnost stadiona na kojem klub igra domaće utakmice.

- zabrana učešća u postupku od 1 do 3 godine licenciranja klubova za uefa-ina takmičenja.

Mjere iz prethodnog stava izriče Disciplinska komisija NS/FS BiH na prijedlog Administracije za licenciranje NS/FS BiH.

Ukoliko aplikant za licencu ne ispuni neki od kriterija "B" definisanih u Pravilniku o licenciranju klubova, to ne dovodi do odbijanja izdavanja licence nego do izricanja sankcije kako slijedi:

- opomena;
- novčana kazna;
- zabrana igranja utakmica na određenom stadionu.

Mjere iz prethodnog stava izriče Disciplinska komisija NS/FS BiH na prijedlog Administracije za licenciranje NS/FS BiH.

Aplikantu za licencu ne može biti izrečena ista mjera u dvije uzastopne sezone u slučaju neispunjena istog kriterija.

### **Član 72.**

Ukoliko klub u toku sezone prekrši odredbe iz člana 42. UEFA-inog Pravilnika o licenciranju klubova, a koje se odnose na obavezu zamjene (popune mesta) tokom sezone, će se kazniti:

- opomenom ili
- novčanom kaznom u iznosu od 500 KM do 2.000 KM,  
a u ponovljenom slučaju od 2.000 KM do 5.000 KM.

U slučaju da klub koji nije obuhvaćen postupkom licenciranja klubova ne ispunjava uslove iz propozicija odgovarajućeg takmičenja, kazniće se:

- novčanom kaznom od 1.000 KM do 3.000 KM.

### **Negativne pojave većih razmjera ili značenja**

### **Član 73.**

Klub, njegov član ili službeno lice koji doprinese, učestvuje, ne spriječi ili ne preduzme preventivne mjere protiv negativnih pojava većih razmjera ili većeg značaja, za koje je odgovoran na utakmici, u takmičenju, u svom radu ili poslovanju, ili u vezi sa njima, će biti kažnjen:

- klub - oduzimanjem od dva do šest bodova ili kaznom od dva do šest negativnih bodova i novčanom kaznom od 2.000 KM do 5.000 KM;
- nogometni/fudbalski radnik - zabranom vršenja funkcije od šest mjeseci do godinu dana;
- igrač - zabranom igranja od šest mjeseci do godinu dana, a u težem ili ponovljenom slučaju će biti kažnjen;
- klub - oduzimanjem od tri do devet bodova ili kaznom od tri do devet negativnih bodova i novčanom kaznom od 5.000 KM do 20.000 KM;
- nogometni/fudbalski radnik - zabranom vršenja funkcije od jedne do dvije godine
- igrač - zabranom igranja od jedne do dvije godine.

Pod negativnim pojavama većih razmjera smatraju se: ugrožavanje fizičkog integriteta svih učesnika utakmice (igrači, službena lica, gledaoci, redari, pripadnici policije itd.), uzrokovanje veće materijalne štete na stadionu i van stadiona, i slične pojave, ukoliko se ne radi o izolovanom postupku pojedinaca ili manje grupe navijača.

### **Posebne odredbe o kažnjavanju u skladu sa FIFA Disciplinskim pravilnikom**

### **Član 74.**

Izuzetno od odredbi ovog Pravilnika, a u cilju provođenja zahtjeva FIFA-e za primjenu posebnih sankcija, utvrđuju se slijedeće odredbe o kažnjavanju:

Ko javno uvrijedi, diskriminira ili ocrni nekoga na klevetnički način zbog rase, boje, jezika, religije ili etničkog porijekla, ili počini neki drugi diskriminirajući ili uvredljiv čin, biće predmet suspenzije od najmanje pet utakmica na svakom nivou. Nadalje, počinilac će dobiti zabranu pristupa stadionu i novčanu kaznu do 20.000 KM. Ukoliko je počinilac neki zvaničnik, novčana kazna će biti do 30.000 KM.

Ukoliko gledaoci pokazuju transparente koji imaju diskriminirajuće slogane ili su

krivi za neko drugo diskriminirajuće i/ili uvrjedljivo ponašanje na utakmici, odgovarajuće tijelo će propisati kaznu do 30.000 KM, za asocijaciju ili klub, za kojeg predmetni gledaoci navijaju, te će narednu zvaničnu utakmicu odigra bez gledalaca. Ukoliko se gledaoci ne mogu identifikovati kao navijači jedne ili druge asocijacije ili kluba, asocijacija ili klub domaćin biće sankcionisani u skladu s tim.

Gledaocu koji bude kriv za bilo koji prekršaj naveden u stavu 1. i/ili 2. ovog člana, biće zabranjen ulazak na bilo koji stadion najmanje 2 (dvije) godine.

Ako neki igrač, zvaničnik asocijacije ili kluba ili gledalac počini bilo koji od diskriminirajućih ili uvrjedljivih aktivnosti opisanih u stavu 1. i/ili 2. ovog člana, od predmetnog tima će se automatski oduzeti tri boda, ukoliko se to identificuje, nakon prvog prekršaja. U slučaju drugog prekršaja, automatski će se oduzeti šest bodova, a za naredni prekršaj tim će biti prebačen u niži stepen takmičenja.

### **Sudijski prekršaji**

#### **Član 75.**

Sudac koji u određeno vrijeme neopravdano ne dođe da vodi utakmicu, ili dođe na stadion, a utakmicu opravdano ne vodi, a nije blagovremeno otkazao, će biti kažnjen:

- zabranom suđenja od tri do šest mjeseci,  
a u težem ili ponovljenom slučaju
- zabranom suđenja od šest mjeseci do godinu dana.

#### **Član 76.**

Sudac koji neopravdano prekine utakmicu će biti kažnjen:

- zabranom suđenja od šest mjeseci do godinu dana.

#### **Član 77.**

Sudac kojem se poništi utakmica zbog bitne povrede odredaba Pravila nogometne/fudbalske igre, će biti kažnjen:

- zabranom suđenja od šest mjeseci do godinu dana,  
a u težem ili ponovljenom slučaju:
- zabranom suđenja od jedne do dvije godine.

#### **Član 78.**

Sudac koji podnese netačan izvještaj o utakmici na kojoj je obavio dužnost suca ili asistenta suca, će biti kažnjen:

- zabranom suđenja od tri do šest mjeseci,  
a u težem ili ponovljenom slučaju:
- zabranom suđenja od šest mjeseci do godinu dana.

#### **Član 79.**

Sudac koji se nesportski ponaša za vrijeme suđenja, će biti kažnjen:

- zabranom suđenja od tri mjeseca do godinu,  
a u težem ili ponovljenom slučaju:
- zabranom suđenja od jedne do dvije godinu.

#### **Član 80.**

Sudac koji naplati taksu ili troškove suđenja više nego što je propisano, će biti kažnjen:

- zabranom suđenja u trajanju od tri do šest mjeseci, a u težem ili ponovljenom slučaju:
- zabranom suđenja od šest mjeseci do jedne godine ili isključenjem iz nogometne/fudbalske organizacije.

Sudac je obavezan vratiti klubu razliku više naplaćenih troškova suđenja u odnosu na propisima utvrđeni iznos.

### **Član 81.**

Sudac koji daje izjavu o suđenju u sredstvima informisanja, će biti kažnjen:

- novčanom kaznom od 1.000 KM do 2.000 KM, a u težem ili ponovljenom slučaju:
- novčanom kaznom od 2.000 KM do 5.000 KM.

### **Član 82.**

Sudac koji na stadionu vrijeđa ili kleveta gledaoce, funkcionera nogometne/fudbalske organizacije, klub ili članove uprave kluba, a u vezi sa nogometnim/fudbalskim sportom, će biti kažnjen:

- zabranom suđenja od tri do šest mjeseci, a u težem ili ponovljenom slučaju:
- zabranom suđenja od šest mjeseci do jedne godine ili isključenjem iz nogometne/fudbalske organizacije

### **Član 83.**

Sudac koji za vrijeme suđenja ili poslije utakmice fizički napadne igrača, funkcionera kluba i Saveza, ili gledaoca, će biti kažnjen:

- zabranom suđenja od šest mjeseci do godinu dana, a u težem ili ponovljenom slučaju:
- zabranom suđenja od jedne do dvije godine.

Sudac koji samoinicijativno vodi međunarodne utakmice sudi bez saglasnosti NS/FS BiH će biti kažnjen:

- zabranom suđenja od šest mjeseci do godinu dana, a u težem ili ponovljenom slučaju:
- brisanjem iz sudske organizacije.

## **III POSTUPAK**

### **Disciplinski organi**

#### **Član 84.**

Kaznu izriče nadležni disciplinski organ nogometnog/fudbalskog rukovodstva i kluba.

#### **Nogometni/Fudbalski savez Bosne i Hercegovine**

#### **Član 85.**

Disciplinski organ NS/FS BiH nadležan je za rješavanje u prvom stepenu o svim prekršajima koje su izvršili:

a) članovi Izvršnog odbora NS/FS BiH, članovi pravnih tijela NS/FS BiH i članovi organa Izvršnog odbora NS/FS BiH, kao i bilo koji drugi član NS/FS BiH sa bilo

kojeg nivoa (opštinskog,kantonalnog,županijskog,područnog i entitetskog), a u vezi sa utakmicama u organizaciji takmičenja kojim rukovode i koje odobravaju organi NS/FS BiH.

- b) igrači, funkcioneri, stručni i tehnički rukovodioci, klubovi, službena lica i treneri na svim utakmicama i u vezi sa utakmicama odigranim u okviru takmičenja kojim rukovode i koje odobravaju organi Izvršnog odbora NS/FS BiH, osim u slučajevima iz člana 15. stav 1. ovog Pravilnika, kao i utakmicama svih reprezentacija NS/FS BiH i prekršajima učinjenim u vezi sa tim utakmicama;
- c) klubovi, u vezi sa obavezama prema Savezu;
- d) klubovi, u vezi sa obavezama iz Pravilnika o licenciranju klubova NS/FS BiH;
- e) klubovi, funkcioneri i igrači u vezi sa naknadama prilikom prelaska igrača iz kluba u klub.

Protiv odluka disciplinskog organa Izvršnog odbora NS/FS BiH donesenih u prvom stepenu može se uložiti žalba drugostepenom organu koji je određen Statutom NS/FS BiH – Apelacionoj komisiji NS/FS BiH, u roku od 8 (osam) dana od prijema pismene prvostepene odluke.

### **Entitetski nogometni/fudbalski savez**

#### **Član 86.**

Disciplinski organ entitetskog nogometnog/fudbalskog saveza nadležan je za rješavanje u prvom stepenu o svim prekršajima koje su izvršili:

- a) članovi Izvršnog odbora, pravnih tijela i organa Izvršnog odbora entitetskog saveza, kao i bilo koji drugi član NS/FS BiH sa bilo kojeg nivoa (opštinskog,kantonalnog,županijskog,područnog i entitetskog), a u vezi sa utakmicama u organizaciji takmičenja kojim rukovode i koje odobravaju organi entitetskih saveza.
- b) igrači, funkcioneri, stručni i tehnički rukovodioci, klubovi, službena lica i treneri na svim utakmicama i u vezi sa utakmicama odigranim u okviru takmičenja kojim rukovode i koje odobravaju organi izvršnog odbora entitetskog saveza, osim u slučajevima iz člana 15. stav 1. ovog Pravilnika, kao i utakmicama svih selekcija entitetskog saveza i prekršajima učinjenim u vezi sa tim utakmicama.
- c) klubovi, u vezi sa obavezama prema savezu;
- d) klubovi, u vezi sa obavezama iz propozicija takmičenja;
- e) klubovi, funkcioneri i igrači u vezi sa naknadama prilikom prelaska igrača iz kluba u klub.

Protiv odluka disciplinskog organa entitetskog saveza donesenih u prvom stepenu može se uložiti žalba drugostepenom organu koji je određen statutom entitetskog saveza, u roku od 8 (osam) dana od prijema pismene prvostepene odluke.

### **Kantonalni, županijski, područni nogometni/fudbalski savezi**

#### **Član 87.**

Disciplinski organ nogometnog/fudbalskog saveza kantona, županije ili područja nadležan je da u prvom stepenu rješava o svim prekršajima koje su izvršili:

- a.) članovi izvršnog odbora kantonalnog, županijskog ili područnog saveza, članovi pravnih tijela saveza i članovi organa izvršnog odbora saveza, kao i bilo koji drugi član NS/FS BiH sa bilo kojeg nivoa (opštinskog, kantonalnog, županijskog, područnog i entitetskog), a u vezi sa utakmicama u organizaciji takmičenja kojim rukovode i koje odobravaju organi kantonalnih, županijskih i područnih savezi.
- b.) igrači, funkcioneri, stručni i tehnički rukovodioci, klubovi, službena lica i treneri na svim utakmicama i u vezi sa utakmicama odigranim u okviru takmičenja kojim rukovode i koje odobravaju organi izvršnog odbora kantonalnog, županijskog ili područnog saveza, osim u slučajevima iz člana 15. stav 1. ovog Pravilnika, kao utakmicama svih selekcija kantonalnog, županijskog ili područnog saveza prekršajima učinjenim u vezi sa tim utakmicama.
- c.) klubovi, u vezi sa obavezama prema kantonalnom, županijskom ili područnom savezu;
- d.) klubovi kantonalnog, županijskog ili područnog stepena takmičenja, u vezi sa obavezama iz propozicija takmičenja;
- e.) klubovi, funkcioneri igrači i rukovodstva saveza kada je riječ o propisima o registraciji igrača koji prelaze iz kluba u klub.

Protiv odluka disciplinskog organa iz ovog člana donesenih u prvom stepenu može se uložiti žalba drugostepenom organu koji je određen statutom kantonalnog, županijskog ili područnog saveza.

Kantonalni/županijski i područni savez može donijeti propise o nadležnosti disciplinskih organa nižih stepena takmičenja od kantonalnog.

### **Klubovi**

#### **Član 88.**

Disciplinski organ kluba izriče kazne članovima kluba za prekršaje učinjene prema klubu.

Ukoliko kazne kluba nisu verifikovane od nadležnog disciplinskog organa saveza, iste važe samo u okvirima kluba.

Protiv odluke disciplinskog organa kluba donesene u prvom stepenu može se uložiti žalba drugostepenom organu kluba.

### **Odlučivanje**

#### **Član 89.**

Disciplinski organ koji je odlučivao u prvom stepenu ne može odlučivati o istom predmetu u drugom stepenu.

Disciplinski postupak je javan, osim vijećanja i glasanja.

### **Pokretanje postupka**

#### **Član 90.**

Disciplinski postupak može biti pokrenut:

- a) izvještajem delegata i drugih službenih lica na utakmicama;
- b) izvještajem suca;

- c) prijavom nogometnog/fudbalskog rukovodstva;
- d) prijavom kluba;
- e) prijavom nadležnog takmičarskog ili stručnog sudijskog organa;
- f) po prijavi Tužioca NS/FS BiH.

### **Član 91.**

Prijava se podnosi nadležnom disciplinskom organu koji odlučuje o pokretanju postupka.

### **Član 92.**

Prije pokretanja postupka disciplinski organ treba utvrditi nadležnost za vođenje postupka.

Ako disciplinski organ nije nadležan za konkretni slučaj, dužan je da predmet ustupi nadležnom disciplinskom organu.

Sukob nadležnosti disciplinskih organa rješava zajednički neposredno viši disciplinski organ.

### **Tok postupka**

#### **Član 93.**

Nakon utvrđivanja svoje nadležnosti, disciplinski organ pristupa pozivanju i saslušanju prijavljenog lica, kako bi mogao odlučiti o pokretanju disciplinskog postupka i o tome donijeti formalnu odluku.

Ako prijavljeno lice ne živi u mjestu sjedišta disciplinskog organa, onda će se saslušanje izvršiti zamolnicom, putem nogometnog/fudbalskog rukovodstva u tom mjestu ili putem kluba.

Ako je riječ o isključenom igraču, smatra se kao da je saslušan, pa će nadležni disciplinski organ odlučivati o prekršaju na osnovu materijala kojim raspolaže.

#### **Član 94.**

Disciplinski postupak mora biti hitan i ekonomičan.

Prvostepeni disciplinski postupak mora biti završen i prvostepena odluka donesena u roku od dva mjeseca, računajući od dana podnošenja prijave.

Ukoliko u tom roku postupak nije završen, podnositelj prijave i tužilac NS/FS BiH imaju pravo žalbe drugostepenom organu.

#### **Član 95.**

U disciplinskom postupku saslušanje prijavljenog lica, svjedoka i prikupljanje ostalih dokaznih sredstava vrše od strane disciplinskog organa određeni članovi i zamoljeni organi.

Prijavljeno lice i klub ima pravo tražiti da o svom trošku prisustvuje sjednici disciplinskog organa radi detaljnijeg obrazloženja, odnosno saslušanja, te može da angažuje branioca.

### **Utvrđivanje činjenica**

#### **Član 96.**

Disciplinski organi zasnivaju odluke i izriču kazne na osnovu dokaza provedenih u toku postupka.

## **Obustavljanje postupka**

### **Član 97.**

Kada disciplinski organ utvrdi osnovanost ili neosnovanost prijave podnijete organu na rješavanje, isti će odlukom prihvatiti ili odbaciti podnesenu prijavu.

Ako disciplinski organ odbacuje prijavu podnosioca, isti je dužan u obrazloženju odluke navesti razloge iz kojih se postupak dalje ne može voditi i napisati pravnu pouku.

Ako disciplinski organ u toku postupka utvrdi postojanje neke okolnosti zbog koje je onemogućeno dalje vođenje postupka, disciplinski organ će donijeti odluku o obustavljanju postupka.

Protiv odluke o odbacivanju ili obustavljanju postupka, podnositelj prijave ima pravo podnijeti žalbu Apelacionoj komisiji NS/FB BiH u roku od 8 (osam) dana od prijema odluke.

## **Troškovi postupka**

### **Član 98.**

Ako su disciplinskim postupkom prouzrokovani troškovi, nadležni disciplinski organ će u izreci riješiti ko snosi troškove.

Za preduzimanje radnji koje prouzrokuju troškove u disciplinskom postupku nadležni disciplinski organ prethodno mora donijeti odgovarajuću odluku.

Ako su klub, ili članovi protiv kojih je vođen postupak, oslobođeni disciplinske odgovornosti, troškove postupka snosi rukovodstvo čiji je organ donio odluku.

Ako su klub, ili član kluba protiv kojih je vođen postupak, kažnjeni, troškove snosi klub.

U opravdanim slučajevima, ako su troškovi disciplinskog postupka prouzrokovani krivicom kluba, nadležni disciplinski organ može odlučiti da troškove snosi taj organ.

## **Suspenzija**

### **Član 99.**

Suspenzija može biti:

- automatska;
- na osnovu odluke disciplinskog organa.

## **Automatska suspenzija**

### **Član 100.**

Automatska suspenzija nastupa kada igrač bude isključen iz igre na javnoj utakmici, osim na međunarodnim utakmicama za koje važe propisi međunarodnih asocijacija.

Automatska suspenzija nastala isključenjem na prijateljskim utakmicama automatski prestaje danom davanja izjave isključenog igrača, a disciplinski postupak se nastavlja prema odredbama ovog Pravilnika.

Disciplinski organ može donijeti odluku o ukidanju automatske suspenzije ukoliko nađe da joj nema mjesta imajući u vidu učinjeni prekršaj. Na prvenstvenim turnirima ovu odluku može donijeti disciplinski sudija turnira, s tim što je obavezan da kompletan spis predmeta dostavi nadležnom disciplinskom organu koji će odlučiti o eventualnom pokretanju disciplinskog postupka.

Igrač na izdržavanju sudske kazne nalazi se pod automatskom suspenzijom za svo vrijeme trajanje te kazne.

Automatska suspenzija uračunava se u kaznu.

### **Suspenzija na osnovu odluke disciplinskog organa**

#### **Član 101.**

Ako klub, igrač, sudija, trener, rukovodilac ili drugi nogometni/fudbalski radnik u ostavljenom roku, na osnovu pravosnažne odluke nadležnog organa ne isplati određenu novčanu kaznu ili drugu finansijsku obavezu prema drugom klubu, nadležnom nogometnom/fudbalskom rukovodstvu, igraču, treneru, sudiji ili nogometnom/fudbalskom radniku, u vezi sa sportskim odnosima, biće suspendovan odlukom nadležnog disciplinskog organa.

Suspenzija počinje da teče danom isteka ostavljenog roka za isplatu novčane kazne ili obaveze, a ukida se:

- odlukom disciplinskog organa čim se utvrdi da prestao razlog suspenzije
- automatski poslije izvršene uplate punog iznosa kazne ili obaveze,  
odnosno dospjele rate

Klub je dužan istog dana dostaviti obavijest o izvršenju obaveze nadležnom takmičarskom organu putem telefaksa ili elektronskom poštom, a u svrhu preduzimanja odgovarajućih mjera u vezi sa eventualno predviđenim utakmicama do tada suspendovanog kluba.

#### **Član 102.**

Suspenzija na osnovu odluke disciplinskog organa može se izreći igračima, klubovima, funkcionerima, stručnim i tehničkim rukovodiocima, sudijama i trenerima, u svim slučajevima kada je za izvršeni prekršaj predviđena teža kazna.

Suspenzija iz prethodnog stava počinje nakon isteka 48 sati od prijema odluke – službenog saopštenja i traje 30 dana.

Ukoliko isljeđenje nije izvršeno u roku od mjesec dana, suspenzija se može produžiti odlukom disciplinskog organa još za mjesec dana.

Vrijeme provedeno pod suspenzijom uračunava se u kaznu.

Suspenzija izrečena zbog nedolaska na saslušanje prestaje nakon što pozvani pristupi saslušanju.

Ako izvršilac prekršaja i poslije poziva ne dođe na saslušanje, a od poziva prođe osam dana, izreći će se kazna na osnovu materijala kojim raspolaže disciplinski organ. O tome da je poziv za saslušanje uručen izvršiocu prekršaja treba da postoje odgovarajući pismeni dokazi.

### **Odluke disciplinskih organa**

#### **Član 103.**

Izreka svake odluke o kazni mora biti objavljena putem službenog saopštenja uz naznaku vremena kada kazna počinje teći.

U odluci disciplinskog organa mora biti navedeno: opis prekršaja, vrsta prekršaja, kazna, obrazloženje i pouka o pravnom lijeku.

#### **Član 104.**

Nadležni disciplinski organ dužan je da svaku izrečenu kaznu pismeno, telefaksom ili elektronskom poštom saopšti klubu čiji je tim, ili igrač kažnjen i to najkasnije u roku od 24 sati od dana izricanja kazne.

Odluka o kazni mora biti saopštena klubu najkasnije 24 sati prije odigravanja prve utakmice koja se računa u kaznu.

Kazna teče od dana saopštenja iste klubu. Ako je kažnjeni igrač bio pod suspenzijom, kazna teče od dana saopštenja odluke o suspenzije klubu, odnosno od dana kada je nastala automatska suspenzija.

Prvostepeni disciplinski organ dužan je da po službenoj dužnosti prati izvršenje kazne.

#### **Žalbeni postupak**

#### **Član 105.**

Protiv prvostepene odluke može se uložiti žalba drugostepenom organu.

Žalba se podnosi u roku od osam dana od prijema pismene odluke prvostepenog organa.

Žalba se predaje pismeno disciplinskom organu povg stepena, koji u roku od tri dana kompletan spis predmeta dostavlja na rješavanje disciplinskom organu drugog stepena.

U žalbenom postupku prvostepeni organ će utvrditi da li je žalba dopuštena, uredna i propisno taksirana, da li je blagovremena, izjavljena od ovlaštenog lica i dopuštena.

Neblagovremene, nedopuštene i žalbe izjavljene od neovlaštenog lica bit će rješenjem odbačene.

Netaksirane i neuredne žalbe vraćaju se žaliocu na dopunu, ispravku ili plaćanje propisane takse i pri tome im se ostavlja 72 (sedamdesetdvaka) sata za intervencije.

Ako u datom roku nedostaci ne budu otklonjeni, žalba se odbacuje rješenjem.

Protiv rješenja o odbacivanju neblagovremene i nedopuštene žalbe žalioc ima pravo žalbe drugostepenom organu.

Blagovremenu žalbu prvostepeni organ dužan je, bez odlaganja, dostaviti nadležnom drugostepenom organu.

#### **Član 106.**

Ako organ koji je donio odluku o prekršaju, povodom žalbe ustanovi da provedeni postupak nije bio potpun, a da je to moglo uticati na rješenje o stvari, on će postupak upotpuniti prije dostavljanja žalbe drugostepenom organu.

#### **Član 107.**

Žalbu mogu uložiti:

- kažnjeni
- tužilac
- klub čiji je član kažnjen
- ostali subjekti ovlašteni za pokretanje disciplinskog postupka u smislu člana 90. ovog Pravilnika.

### **Član 108.**

Žalba na odluku o kazni ne odlaže provođenje zabrane igranja, odnosno vršenja dužnosti u nogometnoj/fudbalskoj organizaciji.

### **Član 109.**

Rješavajući o žalbi, drugostepeni disciplinski organ može odluku o disciplinskom prekršaju:

- potvrditi;
- preinačiti;
- ukinuti.

Drugostepeni disciplinski organ će ukinuti odluku o disciplinskom prekršaju kada utvrdi da ga je donio stvarno nenađežni disciplinski organ i predmet će ustupiti stvarno nadležnom disciplinskom organu.

Drugostepeni disciplinski organ će ukinuti odluku o prekršaju, kada ustanovi da je potrebno dopuniti postupak ili sprovesti novi postupak, vratice ga sa spisima prvostepenom organu da ovaj doneše novu odluku.

Prvostepeni disciplinski organ kojem je predmet vraćen, dužan je izvršiti posebne radnje radi dopune postupka.

Povodom žalbe, drugostepena odluka o prekršaju ne može biti izmijenjena na njegovu štetu, osim ako je žalbu izjavio ovlašteni tužilac.

Drugostepeni disciplinski organ može preinačiti odluku zbog pogrešne pravne ocjene djela (kvalifikacije), zbog vrste i visine kazne ili ako se utvrdi da djelo okrivljenog nema obilježja disciplinskog prekršaja, pa se iz tih razloga prekršajni postupak obustavi.

U drugostepenom postupku ne mogu se ocjenjivati dokazi niti utvrđene činjenice koje nisu navedene u prvostepenom postupku, osim dokaza koje žalioc iz opravdanih razloga nije mogao predočiti u nadležnom prvostepenom organu.

Drugostepeni disciplinski postupak mora biti okončan u roku od tri mjeseca.

## **IV PONAVLJANJE POSTUPKA**

### **Član 110.**

Postupak koji je pravosnažnom odlukom nadležnog organa završen može se ponoviti:

- a) ako se dokaže da je pravosnažna odluka zasnovana na lažnim dokumentima;
- b) ako postoje nove činjenice i novi dokazi koji bi bili od uticaja na odluku, a koje učinilac prekršaja ranije nije znao.

Nije dozvoljeno podnošenje prijedlog za ponavljanje postupka u slučaju odluka o suspenziji.

### **Član 111.**

Prijedlog za ponavljanje postupka može podnijeti svako lice i svi organi iz člana 90. ovog Pravilnika.

### **Član 112.**

Prijedlog za ponavljanje postupka podnosi se:

- izvršnom odboru kantonalnog, županijskog ili područnog saveza, putem organa koji je donio odluku, ako je riječ o odlukama organa kantonalnog, županijskog ili područnog saveza

- Izvršnom odboru entitetskog saveza, putem organa koji je donio odluku, ako je riječ o odlukama organa entitetskog saveza
- Izvršnom odboru NS/FS BiH, putem organa koji je donio odluku, ako je riječ o odlukama organa NS/FS BiH

Prijedlog za ponavljanje postupka može se podnijeti u roku od tri mjeseca od dana dostavljanja pravosnažne odluke.

### **Član 113.**

Izvršni odbor nadležan za rješavanje, ako usvoji prijedlog za ponavljanje postupka, predmet će dostaviti organu koji je donio prvpstenu odluku, radi donošenja nove odluke.

Prijedlog za ponavljanje postupka ne odlaže izvršavanje pravosnažne odluke o kazni.

## **V VANREDNO UBLAŽAVANJE KAZNE**

### **Član 114.**

Kada postoje nesumnjivi dokazi da je izrečena kazna ostvarila svoju vaspitnu i sportsko-etičku svrhu, ili kada su se pojavile nove okolnosti nastale nakon pravosnažnosti odluke o kazni ili okolnosti koje su postojale u vrijeme izricanja kazne za koje disciplinski organ nije znao i druge okolnosti, koje bi, prema svojoj prirodi, da su uzete u obzir prilikom odmjeravanja kazne, očigledno na nju uticale da bude blaža po visini ili vrsti, ili bi izazvale oslobođanje učinioca prekršaja, nadležni organi mogu donijeti odluku o ublažavanju kazne ili oslobođanju od daljeg izdržavanja kazne.

Molba za vanredno ublažavanje kazne može se za jednog počinioca prekršaja uputiti samo jednom u toku iste takmičarske godine i to izvršnom odboru saveza čiji je organ donio odluku, pod uslovom da je proteklo 2/3 izrečene kazne.

Molba za vanredno ublažavanje kazne podnosi se putem nadležne komisije za propise.

## **VI**

## **PRELAZNE I ZAVRŠNE ODREDBE**

### **Član 115.**

Izvršni odbor NS/FS BiH ovlašten je da izdaje uputstva za primjenu ovog Pravilnika.

### **Član 116.**

Ukoliko je prekršaj počinjen prije stupanja na snagu ovog Pravilnika, primjenjuju se odredbe ranijeg Pravilnika, donesenog na sjednici Komiteta za normalizaciju NS/FS BiH na sjednici održanoj 21.06.2012. godine, ukoliko su povoljnije za počinioca prekršaja.

### **Član 117.**

Ovaj Pravilnik usvojen je na sjednici Izvršnog odbora NS/FS BiH, održanoj dana 25.06.2013. godine.

Pravilnik stupa na snagu danom donošenja, a primjenjuje se 7 (sedam) dana od dana objave u Službenom glasniku NS/FS BiH „Nogomet/Fudbal BiH“.

**PREDsjEDNIK  
Elvedin Begić, s.r.**